

Date – 05/09/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n USA-a a kal chhan ber chu zo hnaathlak inpumkhatna kawng zawng turin a ni a ti.
2. Ramchhung hmung dang rualin vawiin khan Mizoram pumah Zirtirtute Ni, Teachers Day vawi 63-na lawm a ni.
3. State Transport Authority in internet kaltlanga lirthei koh theihna Online Cab Booking System a kalpui dawn.
4. Election Commission chuan vawiin khan Haryana Assembly inthlan chungchanga hriattirna a ti chhuak.

<><><>

CM

Chief Minister Pu Lalduhoma'n USA-a a kal chhan ber chu zo hnaathlak inpumkhatna kawng zawng turin a ni a ti.

He thu hi nimina Indiana State, USA a cheng Chin Community te hun a hmanpui na ah a sawi a, Pu Lalduhoma chuan unau an ni tiin engtik emaw ah rorelna pakhat hnuaiia din chhuah chu ring tlat turin a chah a, Ram chuan ramri a nei a, hnam erawh chuan ramri a nei lo tih sawiin Sawrkar pathum hnuaiia diklo taka thehdarha an awm chu engtik lai mahin an pawm ngai dawnlo tih a sawi.

Pu Lalduhoma chuan Inpumkhatna thinsung pu theuh turin Chin mite chu a ngen tih sawiin thawhho puiah a sawm a, Mizorama ZORO ten inpumkhatna turin thahnem ngai taka hma an la reng chu lawmawm atih thu a sawi bawk.

Chief Minister chuan Inpumkhatna lamah ke an pen chho zel dawn chu lawmawm atih thu sawiin Chin Relief Committee of Mizoram te, Myanmar Relief Committee, Mizoram te pawhin an thawh hlawk hle a ti a, India sawrkar pawhin harsatna an thlen apiang an bawhzui zel tih sawiin nasa takin tanpuina an dawng tawh tih a sawi bawk.

<><><>

TEACHERS' DAY

Ramchhung hmung dang rualin vawiin khan Mizoram pumah Zirtirtute Ni, Teachers Day vawi 63-na lawm a ni a,

School Education Minister Dr Vanlalhlana'n Zirtirtute Ni, Teacher's Day vawi 63-na pualin ramchhunga zirtirtu zawng zawngte chibai a buk a, a hna chu sawrkarin a ngai pawimawh tih sawiin nunkawng dik zirtirna hna ropui tak a ni a ti.

Minister chuan Teacher's Day puala thuchah a sawiah he thu hi sawiin zirtirtu hna chu nakina ram hruaitu la ni tur leh eizawna kawng zawh thei tura zirlai naupangte kawng kawhhuha, nunkawng dika kaihhruai a ni a ti a. Minister chuan sawrkarin theihtawp chhuahin sum leh pai pawh seng thin mah se, zirtirtute inpekna tel lo chuan a hlawhtling thei lo a ni a ti.

Minister chuan 'Zirtirtute Ni' pualin zirtirtu natna khirkhan tuarte tanpuina tur National Foundation for Teachers Welfare fund chu zirtirtu zawng zawng te'n an thawh khawm thin a ti a. Sum thawhkhawm atang hian kuminah zirtirtu mi 157 hnenah cheng nuai 30 sing 4 tanpuina pek chhuah ani tih sawiin tanpuina chu Mizoram chung leh pawna Damdawi Ina inenkawlte hnenah leh State chung Hospital-a admit-te tan pek thin a ni a ti a. NFTW Fund atanga tanpuina pek chuan Sorkar School leh Private School-a thawk zirtirtute a huam vek a ni a ti.

Teacher's Day hi vawiin khan Mizoram puma zirna in hrang hrang ten hlim takin an hmang a, zirlaiten zirtirtute chawimawina thilpek pe in hemi pual hian hmun hrang hrangah hun hman a ni.

<><><>

NATIONAL TEACHER'S AWARD

Ramchhunga zirtirtu hnathawk tha chawimawina National Teacher's Award chu vawiin khan President Droupadi Murmu in Synod Higher Secondary School zirtirtu Pu Joseph Vanlalhruaia Sailo hnenah a hlan.

Vawiina Rashtrapati Bhavan-a National Teacher's Award hlanna hunah hian President Droupadi Murmu chuan ramchhunga zirtirtu hnathawk tha mi 50 hnenah chawimawina a hlan a, heng zingah hian Mizoram atangin pakhat awmin Pu Joseph Vanlalhruaia Sailo pawh a tel a ni.

Pu Joseph Vanlalhruaia Sailo chuan chawimawina dawng tura thlangtu Mizoram Education Department hotute leh a thawhna school te chungah lawmthu a sawi.

<><><>

STA ON PUBLIC TRANSPORT

State Transport Authority in internet kaltlanga lirthei koh theihna Online Cab Booking System a kalpui dawn a, hei hi man chawia mipui phur lirthei ten sawrkarin chuan man a bithliah an zawm that loh vang anih thu STA chuan a sawi.

STA thuchhuah tarlan danin Mizorama passenger phur chi lirthei chuan man State Transport Authority-in a siam thin chu man chawia mipui phur lirthei neitu ten an zawm tha tawk lo hle thin tih hriat a ni an ti a. Hei vang hian mipuiten lirthei chuan man dik tak man chawia an hman theih nan leh awlsam zawka lirthei hire tur an koh theihna turin internet kaltlanga lirthei koh theihna kalpui turin hma a la mek tih a sawi.

Thuchhuaha an tarlan danin Aizawl khawpuiah an kalpui hmasa ber anga, Online Cab Booking System hi tih hlawhtlin a nih hunah chuan mipui ten lirthei hman man dik tak an chawi thei tawh tura beisei a ni.

STA chuan March thla khan thuchhuah siamin kumin February thla ni 19-a STA thukhawmin a rel angin, man chawi a mipui phur lirthei service, taxi, Autorickshaw leh Maxicab te chuan man a bithliah thar a. 2-Wheeler taxi chu kilometre 1 ah cheng 30 niin, kilometre khat hnuah erawh KM tinah cheng 20 zel a ni ang a, Taxi pangaiah KM 1 ah cheng 55 niin, hemi hnuah KM tinah cheng 45 zel a ni ang a, Autorickshaw chuan man chu Km khatah cheng 35 niin, a hnu KM tinah cheng 25 zel a ni ang a, Maxicab chu metal road a a tlanin, KM 1 ah cheng 3.50 leh metal road lo ah cheng 4 ni turin a lo rel tawh a ni.

<><><>

WATER LEAKAGE REPORTING SYSTEM

PHE Minister Prof Lalnilawma'n thlipui leh ruahpui avanga mipui mamawh phuhru tura hnathawhnaah PHE department chuan harsatna hrang hrang hmachhawmin theihtawp an chhuah thin tih a sawi

He thu hi vawiina PHED pipe atanga tui put vilna tur 'Water Leakage Reporting Software System' a tlangzarh na ah sawiin Minister chuan Tui pump khawl tana tha lo khawpin tui nut thin chang a tam a ti a, tui put vilna software chu hun engemaw chen Aizawl khawpua endik a nih hnu ah, hman tangkai dan a zirin district dangah pawh hman chhoh a nih tur thu a sawi bawk.

Prof. Lalnilawma chuan tui lakkhawl leh pek chhuahte a put ral mai lohna tura tui put vilna tur System tihlawhtling turin khawtlang, ram leh hnam hmangaihna leh neitu nihna thinlungpu chung a PHE-a thawktute leh khawtlang mipui tanrual a pawimawh thu a sawi bawk.

Water Leakage Reporting Software System hi PHED leh Buannel Geo Solution & Services buatsaih a ni a. Mobile phone hmangin Android Playstore leh Apple App Store atangin a thlawnin download theih a ni.

<><><>

MNYF

MNF Thalaite chu vawiin khan Aizawl khawpui chhung kawng chhe lai siamin an hnatlang.

Kawngsiam hnatlang bultanna Vanapa Hall kawta neihah MNF Gen Hqrs Treasurer Pu Lalruatkima chuan kawng chhiat lutuk avanga mipui leh lirthei khalhtute thlavang hauha, kawng siamtha thuai tura sorkar muthlu kaihthawhna tura Aizawl khawpui hmun lun laiah MNF thalai bultuma kawngchhe siam hnatlang koh a ngai ta chu pawh a tih thu a sawi.

Pu Lalruatkima chuan MNF sorkar laiin kawng a tha thin tih sawiin, mi kawng siam sa pawh thawmtha thei lo kalphung thar kalpui chu a vanduaithlak hle a ni, a ti a, Zoram in ruahsur nasa avanga chhiatna hrang hrang a tawh mek laiin Chief Minister ber chuan sap ramah nuam a tawl mek nia mipuiin an hriat thu a sawi bawk a ni.

MNF Thalaite hian Canteen kual atangin kawngchhe lai siam hian an hnatlang tan a, kawng khuarah hian rora leh bitumen pawhlin road roller hmangin an chilh muk leh a ni.

Hetihlai hian vawiin vek khan ZPM Thalai chuan thuthar thehdarhtute kawmin MNF thalaiin Aizawl khawpui kawng chhia an siam chu fakawm an tih thu an sawi a, amaherawhchu an sawrkar chhunga Aizawl khawpui kawng siam thenkhatin fur khat pawh a daih lo chu pawl antih thu sawiin an sawrkar laia kawngpui an siamin a daih reiloh em avanga mahni mawha la ngama vawiina hnatlanga kawngpui chhia an siam chu fakawm an tih thu an sawi a ni.

<><><>

HARYANA ELECTION

Election Commission chuan vawiin khan Haryana Assembly inthlan chungchanga hriattirna a ti chhuak a. Inthlan hriattirna chhuah anih tak avangin nomination thehluk hun pawh hawn nghal a ni a. Tun thla ni 12 thleng nomination thehluk theih a ni a. Ni 13 ah endik a ni ang a. Inhnukdawkh duh tan tun thla ni 16 thleng hun hawn a ni.

Haryana Assembly ah hian seat 90 a awm a. October ni 5 ah vote thlak a ni ang a, October ni 8 ah vote chhiar a ni ang.

<><><>

INDIA-SINGAPORE

India leh Singapore te chuan vawiin khan thawhdunna tur inremna thuthlung Memorandum of Understanding pali an ziak. MoU an ziahnte hi hriselna leh damdawi lama thawhdunnate, zirna leh thiamthil hmasawanna lamte, digital technology leh India-Singapore Semiconductor Ecosystem Partnership te a ni a. Hei bakah hian ram pahnihte hian an thawhdunna chu tilianin Comprehensive Strategic Partnership ah an hlangkai a. Hei hian India Act East Policy nasa zawkin a nawr kal dawn a ni.

Vawiin khan Prime Minister Narendra Modia leh Singapore Prime Minister Lawrence Wong te an inkawm a. Hruaitu pahnihte hian thawhdunna tihhmasawn zel dan tur an sawi dun a ni.

<><><>

SOLAR ALLIANCE

International Solar Festival chu vawiin khan Delhi ah tan a ni a. Prime Minister Narendra Modia chuan internet kaltlanga hawanna thu sawiin India-in ni tha a neih chu kum 10 chhungin a let 32 laiin a pung a ti a. Pu Modia chuan tunhnaia chhoah India chuan solar energy lamah hma a sawn nasa hle tih sawiin G20 ram zingah Paris inremna tihlawhtlingtu ram anih tawh thu a sawi bawkh a ni.

International Solar Alliance hi kum 2015 khan din a ni a, tunah hian member 1-- chaung an awm tawh a ni.

<><><>